

IDENTIDADE KARIZMÁTIKU-MISIONÁRIA INSTITUTU NIAN

Ahi ida ne'ebé labele mate

Liutiha tinam atus ida resin, lejitimu atu ita husu kona-ba ita-nia Institutu nia identidade karizmátiku-misionária, no ida-ne'e signífika husu an rasik se, ohin loron, Filha de Maria Auxiliadora sira fiél ba karizma ne'ebé Espíritu haraik ba ita-nia Fundadór sira. Ho modu partikulár se ita, ohin-loron, iha sintonizasaun tomak ho ida-ne'ebé simu no tranzmiti don Espíritu nian ho preokupasaun típika fundadór sira-nian: katak tempu, istória, distánsia husi orijen, babeur sira mundu nian bele, ho modu ruma, halo sai malirin klima pentekostes nian ne'ebé karakteriza comunidade dahuluk Mornese nia moris.

Ha'u sita testu rua ne'ebé, tuir ha'u-nia hanoin, bele konsidera nu'udar profesia ida ba ita-nia tempu. Ita tenke fila fali ba feto na'in rua, dook malu iha tempu, maibé na'in rua hotu fundadora no "duina"¹ kona-ba sira-nia Fundasaun nia futuru: santa Teresa d'Ávila no Madre Mazzarello.

S. Teresa d'Ávila:

"Ha'u rona dalaruma ema dehan, bainhira ko'alia kona-ba prinsípiu Orden Relijioza sira-nian, katak Maromak halo grasa boot liu ba ita-nia santu antigu sira tanba sira tenke sai fundamentu. Sín, loos duni, maibé labele haluha katak, refere ba sira ne'ebé mai tuir, sira mós fundamentu ba sira ne'ebé moris ohin. Se ita ohin nian konserva fervór antigu sira nian no ita-nia susesór sira mós halo hanesan, edifísiu sei metin nafatin. Dí'ak sá sei halo mai ha'u iha predesesór santu sira se ha'u ne'ebé mukt estraga edifísiu ho ha'u-nia toman aat sira, basá evidente katak sira be mai foun ne'ebé sei modela sira-nia an husi buat ne'ebé sira haree, duké buat ne'ebé liu ona tinan barak? [...] Bainhira ha'u tau ha'u-nia an iha sira-nia oin [Fundadór sira] ha'u koko laran-susar maka'as, no ha'u labele la dehan ho matan-been. Ha'u haree katak ha'u estraga buat ne'ebé sira harii [...] Aleinde ne'e dí'ak atu ita keta lamenta. Ema ne'ebé haree ninia Orden rasik lakon buat ruma, buka atu sai fatuk ida forte tebes atu harii hikas edifísiu. No Na'i sei tulun nia".²

Madre Mazzarello:

"Se buat ne'ebé Don Bosco dehan sei akontese, ita-nia Kongregasaun sei habelar iha mundu tomak; sei bá to'o duni Amérika; maibé se ita hakarak atu konserva nafatin espíritu hanesan iha nia no halo nafatin dí'ak boboot, nesáriu atu ita be mai dahuluk sira iha Kongregasaun, la'ós de'it sai ema moris ho virtude, maibé sai lalenok iha ne'ebé, sira ne'ebé mai tuir ita, bele haree naksira espíritu loos Institutu nian. Ita tenke moris, atua, ko'alia iha maneira atu sira bele no tenke dehan: fervór boot oinsá, ita haree iha ita-nia Irmán dahuluk sira! Observánsia boot oinsá! Espíritu haraik-an no pobreza boot oinsá! Obediénsia boot oinsá! Nune'e sira, hodi tuir ita-nia ezemplu, bele kontinua halo moris entre sira espíritu loos Institutu nian. Basá, imi tenke hatene katak, bainhira Irmán sira sai barak no barak duni, difisil atu sira iha fervór ne'ebé agora ita ne'ebé uitoan iha; Irmán sira hodi sai barak liután no hodi haboot Kongregasaun, espíritu, hakarak ka lakohi sei sofre, no laran-manas no fervór, neineik-neineik sei menus... Maibé se ita ne'ebé mai uluk, hahú atu sai mamar/ fraku, se ita la hadomi, se ita la pratika umildade no pobreza, se ita la observa silénsiu, se ita la moris iha unidade ho Na'i, saida mak sira seluk sei halo?"

¹ Liafuan Papa Bento XVI uza hodi diriji, durante almosu, ba Kardeál no Bispu sinodál sira hodi konvida sira atu harahan Na'i atu "halakan fuan hodi sai duina", katak ho kapasidade atu hateke hanesan Maromak hateke ba mundu. Kf Avvenire 16.10.2012.

² Santa Teresa d'Ávila, Opere. Fondazioni Roma Ed. OCD 2005 IV 6-7.

Bele nota katak liafuan ne'ebé repete iha testu rua ne'e mak liafuan xave ida: **fervór**. Buat hotu mai husi ne'e. Ahi Maromak nia domin nian ne'ebé horik iha ita no nune'e iha forsa atu halakan ema ida nia moris, no husi ne'e, comunidade ida nian no, husi comunidade to'o ba mundu tomak.

Postulante ida tama tiha iha Mornese hateten: "Bainhira ha'u tama iha uma Mornese nian, ha'u hetan fervór barak no espíritu sakrifísiu wain, ne'ebé sai kmaan tanba domin ba Maromak no espíritu karidade nian".

No ita bele halo pergunta ida ba ita-nia an rasik: ema ne'ebé mai iha ita-nia comunidade, iha ambiente ita moris bá hetan fervór, ahi lakan?

Fervór fó hanoin ba ahi: ahi Espíritu Santu nia prezensa nian, ko'alia kona-ba vida ne'ebé sunu, ho sentimentu apasionadu, lakan/ardente; aplika ba moris FMA nian, fervór signifika estilu ida moris nian profundamente evanjéliku, nune'e misionáriu tanba tau ita iha lurón hanesan ho Ida ne'ebé ita tuir no, hanesan evangelista Mateus hateten, dudu ita atu halo hanesan Nia: "ne'ebé la'o tama sidade no knua hotu, hodi hanorin... hodi haklaken Maromak nia Reinu... hodi fó isin di'ak...".

Artigu 1 ita-nia Konstituisaun nian dehan katak Don Bosco hodi funda ita-nia Institutu "imprime iha nia impulsu misionáriu maka'as" no artigu 6 konvida atu "atu hamoris nafatin laran-manas misionáriu orijen sira-nian".

Impulsu no laran-manas: substantivu rua nakonu no signifikativu liu; hatudu movimentu, dalan, estilu peregrinasaun no esensial nian, livre husi buat hotu ne'ebé halo tarde Liafaun salvasaun ninia halai. Liafuan impulsu no laran-manas mak enerjia mai husi Espíritu, forsa espirituál ne'ebé fó kbiit atu haklaken ho atenbarani ne'ebé karakteriza ema sira ne'ebé Espíritu Santu mak gia.

Ita labele moris ho maneira "sedentária" eh tuur-metin, iha komodizmu. Ema ne'ebé tuir Jezús nafatin iha dalan. Fervór, ahi Espíritu nian, bainhira iha bele haree no atua no atrai. Vokasaun misionária sira bele moris de'it iha-ne'ebé iha ahi ne'ebé lakan.

Nune'e mak feto konsagrada ida ita-nia tempu nian hateten: "Problema mak menus vokasaun ka menus ahi ne'ebé lakan sae natón atu bele haree hetan?"³

Rona Liafuan ne'ebé halo ahi anúnsiu nian lakan

Iha bolun atu tuir Jezús iha mós bolun atu sai misionária: "Nia bolu ba nia sira ne'ebé nia hakarak".⁴ Ita labele haluha nafatin katak tuir Jezús signifika sai, hanesan Nia, nafatin iha dalan laho kolen. Ida-ne'e posivel se ita tama iha lójika evanjélika dixipuladu nian.

Iha Jezús nia bolun sentru mak Nia; Jezús mak razaun/motivu moris nian ba dixípulu.

No sai dixípulu, horik "iha mestre nia ain" mak situasaun permanente moris nian la'ós tempu ida pasajen nian. Dixípulu nia identidade mak identidade ne'ebé realiza ona, definitiva, estavel. Apostoladu ninia núkleu mak dixipuladu.

³ CHITTISTER Joan, *Il fuoco sotto la cenere. Spiritualità della vita religiosa qui e adesso*, Milano Ed. Paoline 1998, p. 51.

⁴ Mc 3, 13.

Se dixípulu nia fuan maran, apóstolu niaibun taka. Se falta atitude horik iha Jezús nia ain atu rona Nia, hanesan Maria Betânia nian,⁵ dalan apóstolu nia dalan ba anúnsiu sei para.

Lahó atitude rona, hodi la horik iha maneira konstante no etavel iha atensaun ba Liafuan laiha anúnsiu, laiha la'ó bá, la eziste tensaun misionária; lahó dixípulu ne'ebé hadomi laiha apóstolu ne'ebé haklaken.

Loroloron presiza sai hikas rona-na'in Liafuan nian hanesan Maria Nazaré nian ne'ebé “rai buat hotu iha nia fuan”.⁶ Se ita hakarak sai apóstola sira, anunsidora sira Reinu nian, tuir Jezús ita presiza hatais ninia Inan nia atitude, ita tenke iha Maria nia fuan.

Husi Mornese hateken ida ne'ebé hakohak mundu tomak

Husi tempu Valponasca nian, iha tinan sira ne'ebé Maria Domenica moris vida espirituál intensa iha saran an loroloron nian, husi “janela” ida sai mós hateken ida. Hateken ida ne'ebé fihir metin Maromak no iha Nia to'o ba mundu tomak.

Ita-nia karizma husi nia inísiu kedas mak misionáriu tanba iha nia horik nanis iha Maria Domenica nia fuan ne'ebé, husi kedas sei menina, aprende atu hakat liu baliza sira ninia rain nian, hakat liu kintál no foho.

“Janela ne'ebá”, husi nia mak nia hasoru ninia Maromak, sai mós fatin ne'ebé halo nia komprende Maromak salvasaun nian ne'ebé bolu ba intimidade ho Nia maibé atu bá, hodi nia Naran, iha-nébé de'it iha joven ida ne'ebé hein Liafuan ne'ebé salva.

Ita tenke fila hikas bá Memória moris Orijen nian atu lori mai tempu ohin buat ne'ebé Maria Domenica soi iha nia fuan.

"Maria hadomi maka'as labarik feto sira no nia hakarak halo di'ak la'ós de'it ba sira ne'ebé bá buka nia atu aprende suku, maibé ba sira hotu nia rain nian...".⁷ No iha ninia zelu nia hakarak halo di'ak ba menina hotu mundu nian.⁸

Maria Domenica lori iha fuan impulsu misionáriu no hatene komunika ida-ne'e ba ninia comunidade ne'ebé horik iha foho Borgoalto nian.

Komunidade ida ho “oin misionáriu”

Komunidade dahuluk nia “oin” ita bele haree husi pontudevista barak. Iha “oin” ida-ne'e iha partikulár barak ne'ebé iha armonia konjuntu nian fó ba nia beleza no naroman ida ne'ebé dada ita, maibé tenke mós book ita husi laran atu “oin” ida-ne'e bele naksira ninia roman ohin mós liuhusi ita ida-idak mós.

Ita hakarak hateke ba “oin” ida-ne'e no kapta laran-manas misionáriu ne'ebé, husi inísiu kedas, karakteriza ita-nia Irmán dahuluk sira-nia moris.

⁵ Lc 10, 38-42.

⁶ Lc 2, 51.

⁷ MACCONO I 125.

⁸ Idem. Ita hatene katak Pe Ferdinando Maccono halibur sasin dahuluk sira liuhusi enkontru oioin no kolókiu ho Ir Petronilla Mazzarello, Maria Domenica nia maluk fiél nia belun.

Atu sai misionária loloos laós de'it sai ba rai dook sira maibé, uluknanai, – hanesan Madre Mazzarello hateten – presiza iha “fuan misionáriu boot no jenerozu”,⁹ signifika moris iha klima permanente ézodu nian, peregrinasaun nian no lori iha fuan Maromak no ninia Reinu nia interesse sira. Presiza husik ahi Maromak nia domin nian sunu ita; nune'e de'it mak sakrifísiu no kolen sira sai “ai-han lorloron nian” simu ho hakmatek no ksolok, tanba ita ho Jezús ita tama iha ninia Mistériu Páskua nian.

Iha kuartu ki'ik no kiak Koléjiu Mornese nian, laran-manas misionáriu ne'ebé Madre Mazzarello kuda, bá to'o mundu tomak. Liuhusi surat lubuk ida ne'ebé nia hakerek ba misionária sira, nia mantein kontaktu fraternu no umanu liu ho sira, hodi komunika impulsu laran-luak no sakrifísiu iha ksolok ne'ebé karakteriza ho modu forte comunidade dahuluk Mornese nian.

Iha Mornese, hakaran atu bá misaun konserteza hetan motivasaun husi Salezianu sira nia espedisaun, maibé preokupasaun ba salvasaun ita hetan iha Madre nia fuan.¹⁰ Interessante atu nota oinsá dinámika misionária iha Mornese: uluknanai sira tuir misionáriu sira ho orasaun, hafoin iha mapa, ikusmai sira bá.¹¹

Sasin na'in rua

Irmán Eulalia Bosco:

"Ha'u iha prova lubuk ida kona-ba hakaran ne'ebé Maromak nia Atan iha ba haklaken fiar... Espedisaun misionária dahuluk Salezianu sira-nian realiza iha 1875: iha 1877 akontese espedisaun dahuluk Figlie di Maria Ausiliatrice nian ... Iha tempu ne'e nia intervalu ha'u nu'udar estudante iha Mornese no celebra ho solenidade boot jubileu episkopál Pio IX nian: ha'u rona dehan katak Maromak nia Atan iha loron ne'ebá nakonu ho ksolok estraordinária, tanba to'o mai notísia kona-ba foti rezolusauna tu haruka misionária sira ba Amérika, Figlie di Maria Ausiliatrice. Depoizde notísia sira-ne'e, iha Irmán sira mosu dezeju boot atu bá nu'udar misionária.

Ha'u hanoin katak Irmán sira nia dezeju ne'e tanba mós Maromak nia Atan nia liafuan sira, basá Mons. Costamagna, ne'ebé tempu ne'ebá diretór uma Mornese nian, baibain ko'alia ho entuziazmu kona-ba Misaun sira... Ba Mons. Cagliari [Madre Mazzarello] manifesta dezeju atu Na'i halo Oan-feto sira [Figlie] sira merese atu bá msiaun sira. Ba irmán sira ne'ebé bá ona, nia hameno atu agradece Maromak ba grasa boot haraik ba sira no esprime kuaze inveja santa ba sorte ne'ebé kona sira".¹²

Irmán Enrichetta Sorbone:

"Maromak nia Atan hakarak tebtebes atu Maromak nia Reinu habelar iha hotu-hotu nia neon no fuan liuliu iha uma sira Kongregasaun nian. Ba finalidade ida-ne'e nia oferese ninia orasaun sira, ninia serbisu sira, ninia terus fízika no morál sira, no husu ami, nia oan-feto sira, atu halo hanesan, hodi anima ami atu la husik okaziaun sira atu halo sakrifísiu ba ema maksalak kiak sira nia konversaun liu de'it, no husik atu ami, liuliu bainhira iha Mornese, atu pasa oras ruma kalan nian iha kredo iha Jezús Sakramentadu nia oin atu harohan ba ninia Reinu nia triunfu.

⁹ Surat 47.

¹⁰ Durante Madre Mazzarello moris iha espedisaun tolu: dahuluk 14 Novembru 1877; daruak 2 Janeiru 1879; datoluk entre 2 no 7 Feveireiru 1881, grupu ida bá Uruguay no grupu seluk bá Argentina. Hamutuk Irmán na'in 26 mak bá: 6 iha espedisaun dahuluk; 10 iha daruak no 10 iha datoluk.

¹¹ MACCONO I 318-319.

¹² Positio super virtutis p. 143.

Nia hasolok liu atu haree ninia oan-feto dahuluk sira bá misaun sira no enkoraja sira atu tahan ho ksolok sakrifísiu hotu maski ida atu saran moris ba Jezús Kristu".¹³

Idade foin-sa'e la'ós obstákulu ida atu bá nune'e mós atu asume servisu ida responsabilidade nian. Ba nia no ba Irmán sira sai bá Misaun signifika kandidata an ba martíriu.

Nia hakerek ba sira hodi haksolok ho di'ak ne'ebé sira halo, no ba terus ne'ebé sira tenke tahan, hodi dehan katak "sira sei iha sorte boot se sira hetan grasa atu mate mártir ba ita-nia Na'i ".¹⁴

Nia haksolok bele haruka Irmán sira iha misaun, maski nia presiza sira.

Nia konsidera grasa ida bele sai misionária, presente ida Maromak nian. Nia hakerek ba padre: "Halo lalais atu bolu ami... Oh! Ksolok boot se Na'i halo grasa ida-ne'e atu bolu ami bá iha América".¹⁵

‘Buona notte’ “kurioza” ida, maibé significativa

Vida misionária mak espíritu ida atu moris, estilu ida moris nian tuir Evanjellu; presiza sai pronta nafatin atu fó baut hotu, liuliu atu hadomi, sempre, iha moris simples baibain nian, ho Jezús rasik nia ansiedade salvasaun nian iha fuan laran: "Ha'u mai atu lori ahi iha rai, no oinsá ha'u hakarak haree nia lakan ona".¹⁶

Interesante tebes ‘buona notte’ ida Madre Mazzarello nian ba misionária sira espedisaun datoluk nian. ‘Buona notte’ ida simples tebes, ordinária no baibain to'o halo ita dehan: maibé signifika sá loos buat ne'ebé Madre dehan kona-ba Misaun sira?

Maski nune'e ninia liafuan sira halo ita komprende katak ema ne'ebé iha “fuan misionáriu” de'it mak soi atu bá iha fatin sira misaun nian. “Fuan misionáriu” mak “fuan espíritu Mornese nian”.

Ida-ne' mak ninia liafuan sira:

"Ha'u lahatene imi na'in hira mak rona husi ki'ik kedas: orden esterna mak lalenok ba orden interna. Iha-ne'e mós, iha uma ida-ne'e, ha'u la hatene repete dala hira. Maski nune', ha'u-nia Irmán doben sira, la'ós katak ita nafatun buka hela iha orden no husik buat hotu iha orden. Rona mai, ita halo hanesan buat ne'ebé Irmán di'ak sira S. Ana nian hanorin mai ita husi hahú kedas: dala hira ne'ebé ita tenke inkomoda an atu tau kadeira ida iha nia fatin, banku ida... foti husi rai surat-tahan pedasu ida eh batar nia tahan monu husi ita-nia fatin rai ai-tahan... ita dehan mós jakulatória ida, eh halo hahalok ida domin nian ba Maromak, eh resita requiem ida ba klamar kiak sira iha purgatóriu, eh husu klamar ida ba Na'i.... La'ós katak presiza bá misaun atu sai misionária; no imi misionária sira, se imi la moris kontinualmente ho hanoin atu manán klamar sira no méritu sira, atu imi uza meu hotu atu sai tebes duni Na'i nian no klamar sira-nian, imi misionária sá loos?"¹⁷

Liafuan ne'ebé iha autoridade

¹³ MACCONO II 194-195.

¹⁴ Idem.

¹⁵ Surat 9.

¹⁶ Lc 12, 49.

¹⁷ Cronistoria III 318-319.

Don Bosco ba misionária sira espedisaun dahuluk nian¹⁸ dehan liafuan sira-ne'e: "Hanoin bá katak imi bá misaun atu hafunu salan".¹⁹

Liafuan sira-ne'e to'o iha Mornese tempu barak molok no fó ba Maria Domenica, sei menina, orientasaun apostólíka fundamentál: halo atu foin-sa'e feto sira apresia beleza moris ida haksolok no moos.

"Imi harohan bá, maibé imi halo di'ak hotu imi bele ba juventude, halo buat hotu imi bele atu impede salan maski salan ki'ik".²⁰

Don Bosco nia indikasaun ida-ne'e ita hetan ho modu oioin iha Madre Mazzarello nia surat sira ne'ebé nia hakerek ba misionária sira; sira trasa itineráriu espirituál ho profundidade evanjéliko boot²¹ no nafatin subliña importánsia vida espirituál intensa, konvida ba uniaun íntima ho Jezús "ne'ebé tenke sai ita-nia forsa tomak",²² atu karidade, ahi domin fraternu nian sai sasin vizivel no atraente.²³

Ita hanoin ho modu partikulár indikasaun ida ne'ebé, se moris tuir, garante fraternidade no fekundidade apostólíka.

"... fó hanoin mós ba hotu-hotu atu serbisu lahó ambisaun ida, atu fó ksolok de'it ba Jesus. Ha'u hakarak, atu ita kuda iha Irmán doben sira ne'e hotu nia fuan, domin ba sakrifísiu, hewai an no hado'o an husi hakaran rasik".²⁴

Ne'e katak abandona protagonizmu hotu iha vida fraterna loroloron nian no iha kampu apostólíku, vitória, ho Maromak nia grasa, husi tentasaun hotu atu impoin an, atu avansa direitu sira kona-ba "podér ki'ik-oan sira", atu halo violénsia ho maneira ruma hasoru ema seluk, ne'e katak moris siénsia Krús nian ne'ebé "bele manán de'it bainhira ita bele experimenta krús nia todan" (S. Benedetta della Croce, Edith Stein).

No Madre Mazzarello hakerek ba Ir Ottavia Bussolino,²⁵ sei novisa: "Prepara ó-nia an... atu sai Jesus ne'ebé hedi iha Kruz nia kaben".²⁶

Madre Mazzarello la halo fura-furak eziyénsia sira tuir Kristu nian no nune'e nia hakerek ba Ir Angela Vallese: "konfiansa boot iha Maromak no espírito ida hewai an nian ne'ebé di'ak no ita sei haree katak buat hotu sei la'o di'ak".²⁷

La'ós kestaun despreza an rasik, maibé "la fó presu" katak importánsia ba eziyénsia barak an rasik nian, atu tama iha lójika paskál iha-ne'ebé ego ho ninia tendénsia egoista sira hotu nia mate, prepara ba moris-hi'as ego loloos nian, ida ne'ebé hetan salvasaun, hodi sai "sakrifísiu ne'ebé haksolok Maromak".²⁸ Ne'e mak kriatura foun ne'ebé

¹⁸ Sira na'in neen: Ir Angela Vallese seidaun halo tinan 24; Ir Giovanna Borgna seidaun tinan 18; Ir Angela De Negri husi Mornese halo profisaun ho tinan 16 no bá ho tinan 17; Ir Teresina Mazzarello mós Mornese nian no Ir Petronilla nia sobriña, iha tinan 17; Ir Angela Cassulo ho idade 25 nune'e mós Ir Teresa Gedda.

¹⁹ MACCONO II 14.

²⁰ MACCONO I 102.

²¹ Husi surat sira ne'ebé Madre Mazzarello hakerek, 24 diriji ba misionária sira.

²² Surat 22.

²³ Kf Surat 44.

²⁴ Surat 25.

²⁵ Bá ho espedisaun misionária datoluk.

²⁶ Surat 45.

²⁷ Surat 17.

²⁸ Salmu 50.

finalmente fó fuan. Fuan fatuk nian rahun no moris hi'as fuan isin nian, husi ne'ebé mai virtude sira seluk, liuliu mizerikórdia.

Konkluzau

Bainhira Maria Domenica, la'o tuir dalan to'os nian ba Mornese komunika ba Petronilla ninia hakaran atu dedika an ba menina sira Mornese nian nia espesifika momoos finalidade ne'ebé nia hakarak to'o, loos duni hanorin menina sira profisaun kostureira nian maibé "kompeténsia" ne'e labele halo lakon buat ne'ebé preokupa liu nia: hanorin sira "koñese no hadomi Na'i".²⁹

Ida-ne'e interpela maka'as ita ohin iha kampu apostóliku-misionáriu.

Iha buat ruma iha ita ne'ebé presiza konverte hikas fali karik. Madre Mazzarello, bainhira hahú vida komún ho maluk ruma no hakarak saran an kompletamente ba feto-raan sira, nia haree katak nia hakarak halo "oferta moris nian", iha sentidu katak nia la iha interese sira seluk se la'ós ida atu sai anunsidora Maromak nia domin nian.

Nune'e mak Memória sira hateten: "Maria pretende dedika an tomak ba juventude nia di'ak. Buat sira seluk la iha folin, nia sente impulsu ne'ebé forte liu ba dedikasaun kompleta an rasik nian, ba Maromak nia reinu iha feto-raan sira nia klamar; no la iha buat ida ne'ebé grave liu atu bele to'o bá".³⁰³⁴

Madre Mazzarello nia laran-ta'uk ne'ebé nia espresa iha loron ikus sira moris nian ne'ebé, depoizde abandona mundu, bele harii fali ida "iha laran" ne'ebé desvia husi ezijénsia evanjélica sira tatuir nian, husi Jezús, Aman nia misionáriu kolen-laek, empeña ita no interpela ita ba konversaun korajoza no aten-barani iha moris loroloron: "... no ita la hanoin ba finalidade tanba sá ita mai iha Kongregasaun".³¹

Hodi hateke ba nia, ita-nia Inan santa, ita simu bolun, ohin, atu hasai akudesan sira³² ne'ebé, ho tinan sira, bele halo sai malahuk uitoan iha ita ideál misionáriu ne'ebé nia lori iha fuan no husik hela mai ita, atu, to'o iha dada-iis ikus nian nunka bele kuran iha Institutu obediénsia ba Jezús nia Liafuan: "Imi bá... sarani sira... hanorin sira buat ne'ebé ha'u haruka imi".³³

Ir Erta Cigolla FMA

²⁹ MACCONO I 91.

³⁰ *Cronistoria. La preparazione e la fondazione 1828-1872* (a cura di CAPETTI Giselda) Roma Istituto FMA I 138.

³¹ MACCONO II 351.

³² Surat 36.

³³ Mt 28, 19-20.